



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tiryimym@aolima



tir yimym

TAPAK 8



Ni atsüngdokba nung bendanger teka lir: Gotabaya Rajapaksa

Dinesh Karthik IPL asaya nungi anentsü



VOL. XXI ISSUE NO. 145 (ADOK 145) DIMAPUR

ROGONÜ (FRIDAY)

METSÜREMI (MARCH) 08, 2024

₹ 5.00

## T. John Longkumer-i State Election Commissioner mapa agizükogo



**Dimapur, Metsüremi/March 07 (TYO):** Taoba mapang Nagaland DGP inyaka alisang T. John Longkumer, IPS (Retd) ajanga State Election Commissioner tasenba mapa agizükogo.

Iba sentong ya Nagaland Civil Secretariat, Kohima indang Conference Hall nung March 7, 2024 nü agia liasü.

Iba sentong ya Commissioner & Secretary Urban & Municipal Affairs, Kenilo Apon, IAS lenisüba kübok agi aser Chief Secretary, J. Alam, IAS ajanga oath of office ktdangsüa agia liasü.

## NFHRCC-i metetdaksür

**Dimapur, Metsüremi/March 7 (TYO):** March 7 nü osang kaket balala nung NFHRCC-i pelaba lemsatepba den bendenloksema ano committee-i onük kar lemsatepogo.

Committee-i ashiba agi, parnoki PWD (R&B) Divisional Executive Engineer 7 dang foothill lenmang nung gari koba tashi ka senzüteta ali iba indang Honibarnü NFHRCC office, Kher Mahal Dimapur nung coordination senden amenba

mapang metetdaksütsü mepehia asüngdangogo.

Taoba küm coordination senden nung contractor ajaki 2023 küm December ita tashi nungbo motorable road project tembanga inyaksü ta mulungtepba dak sendakba nung osang agütsütsü nungdaker, ta parnoki ashi.

Maneni Tuli aser Mangolemba division contractor tem iba senden nung adentsü asoshi NFHRCC-isa mepehia metetdaksüo.

## Industries & Commerce aser YES Bank tsüngta MoU zülutep



Department of Industries & Commerce nungi Commissioner & Secretary I&C, Kekhrievor Kevichüsa, IPoS, Director I&C, A. Temjen Jamir, Additional Director I&C, Y. Lipongse Thongtsar aser YES Bank ketdangsürtem March 7, 2024 nü Directorate of Industries & Commerce, Kohima nung MoU zülutepdang tangokba noksa nung angur.

**Dimapur, Metsüremi/March 07 (TYO):**

State telungzük nung Open Network for Digital Commerce (ONDC) takok ngua mapa kuma inyaksü aser ajungkettsü atema Nodal department ama Department of Industries & Commerce, Government of Nagaland ajanga YES Bank aser Sellmetric Pvt. Limited den March 7, 2024 nü Directorate of Industries & Commerce nung Memorandum of Understanding (MoU) ka zülutepa liasü.

E-commerce democratize asütsü atema Open Network for Digital Commerce (ONDC) ya Ministry of Commerce & Industry kübok Department for Promotion of Industry & Internal Trade (DPIIT) indang flagship programme ka lir.

Telok asem tsüngta iba tezüngzüktep agiba nükjidong ya business tila inyakerem, aluyimer aser entrepreneurs tem ONDC sapang ajanga digital sales agütsüba nung lungjemer inyaksü atema lir, koba Government of India ajanga yariba sentong tasen ka alitsü.

Iba MoU zülutepba sentong nung Department nungi Commissioner & Secretary, Industries & Commerce, Kekhrievor Kevichusa, Director, Industries & Commerce, A. Temjen Jamir, Additional Director, Industries & Commerce, Y. Lipongse Thongtsar aser YES Bank nungi Nitin Kuchhal, Executive Vice President, Digital Banking Sales, aser Priyanku Sharma, Vice President, Digital Banking Sales nungertem liasü.

## Ato Kilonser Modi-i Chümoukedima Tribal Cultural Experience semzüktsü



**Kohima, Metsüremi/March 07 (TYO):** Ato Kilonser Narendra Modi-i Brehostibarnü virtual yimya ajanga Midway Retreat nung Chümoukedima Tribal Cultural Experience semzükja liasü.

Iba project ya Dimapur-Kohima tsüngta National Highway-29 tsünglanglen Tsiepama village nung lir.

PM Modi-i iba project ya Ministry of Tourism indang Swadesh Darshan 2.0 scheme nung shilem ka ama Commissioner & Secretary to the Government of Nagaland (Tourism) I. Kitto Zhimomi aser Ministry of Tourism Director Fakhre Alam aser Nagaland Tourism Director Viyelo Doulo nung lia semzükja liasü.

Commissioner & Secretary to the Government of Nagaland (Tourism), Kitto Zhimomi-i iba sentong nung o tatsüka jembidang, Nagaland-i Industrial aser Green revolution memenep saka tourism sector nung tajangzük agitsüla, ta ashi.

Swadesh Darshan 1.0 kübok Peren, Kohima, Wokha, Mokochung, Mon aser Tuensang nung project balala renemogo, ta pai ashi.

Swadesh Darshan 2.0 kübok Niuland aser Chümoukedima district tem nung project balala tenzüka lir. Iba project kübok tanüngba district ti nung project tenzüktsü atema Ministry of Tourism ajanga sen agütsütsü imlar, ta pai ashi.

Swadesh Darshan 1.0 kübok state nung renemer aliba project tem state sorkari yakta semzüktsü aser itemji ajanga Nagaland State Institute of Hotel Management (SIHM) nung hospitality sector nung courses balala agiba kaketshirtem asoshi employment tsütsü maongka agütsütsü, ta Zhimomi-i ashi.

State nung Swadesh Darshan projects ya PPP yimya nung

inyaksü aser item hostel tem anepalutsü asoshi SIHM nungi kaketshir tajung adokdaksüner aser Naga nung yimya awashi ajungba, aser sobaliba tajung ajanga state nung tourism tsütsü temelenshi arutsü, ta pai ashi.

2023 küm asen state indang GDP ya sen crore 37000 shi liasü aser yangji tourism indang shilem 0.1 liasü, koba shilem 5 tashi bo kumdaksütsüla aser ibaji ajanga mapa mangu aliba lanurtem nem mapa agütsütettsü.

Naga nung ya state alema orrbo mapa nung temulung agüja inyaker, saka state telungzük nung 'khusi khusi' akumer aser iba yimyaji indoktsüla, ta Kitto Zhimomi-i ashi.

Iba atema pai SIHM nung azüngertem dang temulung agüja aser bendanga agütsür azüngtsü, mapa inyaksü tejangraba nung state nung tourism sector renlokdaksütsü nükjidong yur azüngtsü ayongzük.

Iba project atema Tsiepama village ajanga ali agütsüba asoshia tenüngsang agüja jembidang Zhimomi-i maneni putu menden dang tarutsü anogotem nunga sorkar aser department den yariteptsü ayongzükja liasü.

Yimtsüng telungzük nung iba project amenokba atema Tsiepama Village Council chairman Seyievizo Vizezuo-i pelaba lemsatep aser lenla ajak nung yariteptsü aser amalitep akatsü ashi.

Paisa project atema department-i nungdakra ali tali agütsütsü ta ashi.

Iba sentong nung Nagaland Association of Tour Operators (NATO) tir Kejaroko Pieru-i ashiba agi, Nagaland nung alinük tebour tajung, sobaliba balala aser yimsü-yimbong ya rongsen ka ngutettsü yongyaseta atar amai lir.

Nagaland nung tourism tsütsü nükla tulu lir, aser

terenlok ataba maongka-a jenti lir, ta pai ashi.

Nungdakba facilities aser ki o jen melira Nagaland ama yimtsüng aser meta tezülen aliba tesemtemi maneni dangar memeneptsü aser tourism ajanga tajangzük bener aruba mangutsü, ta Pieru-i ashi.

Nagaland nung tourism renloksü ya tesemdangertem asoshi tesem tebour tajung yanglutsüba kisüng masü saka asen nüburttem nem tashi agütsüba, asen sobaliba senmang wazüka ayuba aser asen nüburttem asoshi sustainable livelihoods adokdaksüba ya dena lir, ta pai ashi.

Alima den lirumendema hospitality service agütsütsü atema tourism capacity building sentong tem kanga tongtipang lir, ta ashi.

Pai government aser private investors nungi stakeholders ajunga dang lungjemer Nagaland nung tourism ajungkettsü asoshi meranga inyaksü ayongzük.

Ministry of Tourism ajanga taoba mapang terenlok mapa inyakba aser sentong ayongzükba ajanga Nagaland nung tourism aintsü asoshi tamendak dak akanga yanglu, ta Nagaland Tourism Association tir Vimeto Vakha-i ashi.

Ki o jen nung sen indokba, Naga nung sobaliba temaba jenjangi ajungketba aser capacity building amala sentong ayongzükba ajanga state nung tourism sector kanga junga melenshiogo, ta pai ashi.

Iba sentong nung menden ya Additional Director, Tourism, Tiarenla Rutsa liasü aser Project Development and Management Consultant nungi ketdangsür temi iba project undang blueprint PowerPoint presentation agüja liasü.

Iba sentong nung Nagaland SIHM nungi tesayur aser kaketshirtem dena liasü.



## Kohima district kübok sorkar school tajungtibatem nem tetushi agütsü

**Dimapur, Metsüremi/March 7 (TYO):** Kohima District Administration aser District Hub For Empowerment Of Women (DHEW), Kohima na longjemer Kohima District nung Beti Bachao Beti Padhao (BBBP) sentong kübok tajungtiba inyaksangshiba sorkar school tem nem tetushi agütsüba sentong ka March 7 nü DC Conference Hall, Kohima nung ayongzüka agiogo.

Sentong nung Deputy Commissioner Kohima, Kumar Ramnikant, IAS-i ashiba agi, Beti Bachao Beti Padhao, Mission Shakti ajanga tetsür tanurtem kaketshisatsü angazüka teburtem den kasa akümtsü asoshi maongka agütsüogo. Paisa, India renloka alima nung economy tulutiba rongnung ka ama tejakdangi aotsü atema tetsür tebur mebandangi lisopurtem ajaki shilem agitsü nungdaker ta ashi.

Lokti nung tetsür aser tebur tsüingda kecha tebandang malitsüla ta shia, DC-i sentepa

aliba lokti dang sobaliba balala ajanga tetsükdaktsü adokdaktsüba tongpoka oa ajak liromedema aiba lokti ka yangertsü ajungshi.

Ramnikant-isa, tetsür tanurtem nem kaketshisatsü angazükdaktsütsü aser parnok temaba jenjang tongteta Nagaland ya yimjiyimjung nung aliba state ka kümdaktsütsü atema tejakdangi aotsü ajungshiba atema tetushi anguba school tem nungi faculty, staff aser kaketshirtem nem tenüngsang agüja liasü. Maneni DC-i district administration-i takokba tashi teyari agütsütsü tenangzüka agüja liasü.

Kasa mapang nung lokti pela agizükba o jembiba mapang District Education Officer Kohima, Emilo Patton-i, BBBP kübok sobaliba dak sendakba nung tetsür tem jenjang tajungba kümogo, ta ashi. Laisa, Kohima District nung tetsürtem enrolment aser academic performances

naprongla nung tajungba kümogo, tetsürtemi saisapong aser tanga co-curricular activities tem nunga takok tajung nguogo, ta ashi.

Patton-isa, taoba küm pezü tsüingda HSLC tatidang nung sorkar aser private school naprongla nung tetsürtem pass enrolment aser pass percentage tebur dang nungi tajungba lir, ta ashi. Maneni HSSLC tatidang nunga Arts Stream nungbo enrolment aser pass percentage teburtem dang nungi tajungba lir, saka science aser Commerce stream nung meranga inyaksü nungdaker ta ashi.

Category balala nung GPS Garuzou, GMS Aradhura Lerie Chazou, GHS Chandmari aser Razukhrie Government Hr. Secondary School nung nem tetushi agütsü. Item school tem nem kuli kaket aser senpet agüja liasü.

Iba sentong ya EAC Kohima aser Nodal Officer, Mission Shakti, Moasunep K. Jingru lenisüba nung agia liasü.

## MMC Administrator & ERO-i E-Roll 'Special revision' indang metetdaktsü

**Dimapur, Metsüremi/March 7 (TYO):** March 4 nü sangdongba State Election Commission Notification dak ajemdaker Administrator & ERO Mokokchung Municipal Council, Chumlamu Humtsoe-i, Mokokchung Municipal Council atema Electoral Roll 'Special Summary Revision' ya 2024 Janury 1 nü qualifying date ama agia inyaksangshitsü ta metetdaktsüogo.

Electoral Roll draft publication March 8 nü asütsü, claims aser objections March 11 nungi 20 tashi asütsü,

claims aser objections March 21 nungi 27 tashi nung agintsü, pei tata appellate authorities tem nem temepeshiba March 28 nungi April 3 tashi nung agütsütsü, appellate authority-i claims aser objections April 4 nungi 6 tashi nung agintsü, appellate authority-i telemtetba agiba sülen amendments list April 8 nungi 10 tashi nung renemtsü aser Electoral Roll final publication April 12 nü asütsü.

Maneni state election commission notification dak ajemdaker Deputy

Commissioner, Mokokchung ya Mokokchung Municipal Council atema electoral role special summary revision agiba mapang temepeshiba tema dispose asütsü atema appellate authority asütsü.

Special summary revision agitsü atema Enumerators/supervisors/sector magistrates amala kecha meshimtsü. Anungji individual claimant/objector tem dang DC office 2nd floor nung Sadar Branch nung inclusion/deletion atema indang indanga apply asütsü metetdaktsüogo.

## Angh-i Chief Postmaster General, North East Postal Circle den ajurutep



March 7 nü Raj Bhavan nung Chief Postmaster General North East Postal Circle Mariamma Thomas-i Nagaland Angh Governor La Ganesan nem Souvenir pongdang ka agütsüba noksa nung angur.

**Dimapur, Metsürmei/March 7 (TYO):** Chief Postmaster General, North East Postal Circle Mariamma Thomas den Kohima Head Post office nungi ketdangsurtemi Nagaland Angh La Ganesan den Raj

Bhavan, Kohima nung March 7 nü jurutepogo.

Chief Postmaster General NE circle-i Angh nem Souvenir pongdang ka agütsü, kong Shri Ram Janmbhoomi Temple indang commemorative stamps trok aketba Memento ka,

Ramayana' indang kaket, First Day Cover aser Ayodhya nungi tzü aser ali densema liasü.

Parnoki Nagaland State aser North East nung department indang inyakyim balala indang sensaksema liasü.

## NPCB-i sensaksem sentong ka ayongzüka agiogo



**Dimapur, Metsüremi/March 7 (TYO):** Nagaland Pollution Control Board aser Dimapur District Administrator na longjemer National Clean Air Program (NCAP) kübok Dimapur nung kiyong balala lenirtem den March 7 nü Hotel Saramati, Dimapur nung sensaksem sentong ka ayongzüka agiogo.

Sentong nung o jembiba mapang Deputy Commissioner Dimapur, Dr. Tinojongshi Chang, NCS-i, tzü-mopung aser ali menenba dak sendaka aliba tebilemstütem bentetsü asoshi tangsa tang jenjang agitsü nungdaker ta ashiba den tang jenjang tapet magira tarutsü nung timtem tulu ajurutsü, ta shisem.

Paisa, pei ki/kima aser temeket meraka ayutsü koda tongtibang iba indang lemsatepba den nüburtemi merekmejsü atema sorkar dak

dang metaloker aliba ya melenshitsüla, ta ashi.

Deputy Commissioner-i ashiba agi, India ya merekmejua aliba linük ka kümdaktsütsü atema Gandhi nukla aliba tang tashi mataloki lir. Maneni pai kiyong balala lenirtem dang tzü-mopung aser ali menenba dak sendakba nung tebilemdangba tem district administration dangi abentsü ajungshi, koba kanga junga asadangtsü ta paisa tenangzüka agüja liasü.

Kasa mapang nung Scientist 'B' NPCB Yanathung Kithan, Scientist 'B' NPCB Akangmeren Imchen, Junior Scientific Assistant NPCB Rongsenben Longkumer, Junior Scientific Assistant, NPCB Hanpong Konyak nungeri technical interaction sentong ka achaayanga agi.

Sentong nung Member Secretary, NPCB, K Hukato Chishi, IFS-i lokti pela agizükba o jembia liasü.

## 61buba Lirmen Senso Mongdang March 8 & 9 nü agitsü

**Dimapur, Metsüremi/March 7 (TYO):** 61buba Lirmen Senso Mongdang (LSM) March 8 aser 9 nü 10 ako nungi tenzüka Lirmen yimtsüing community hall nung agitsü.

LSM Tir, T Mede maser secretary, S Ayangba Walling nati külem sangdong ka ajanga ashiba agi, anogo ana agitsü aliba mongdang ya "Telongjem Aser Terenlok" omen nung

ajemdaker agitsü, kong mezüngbuba anogo T Sosang Longchar-i (IFS retd) sentepa aliba lokti ajungshitsü.

Senden nungsa LSM general report, senotsü osang, temzüng ozüing osang aser fund raise committee osang agütsütsü.

Nikongtsütsü session nung ketdangpurtem menden melentepba sentong agitsü.

## Longleng DPDB senden March 12 nü amentsü

**Dimapur, Metsürmei/March 7 (TYO):** March ita atema Longleng District Planning & Development Board senden March 12 nü 11 ako nungi tenzüka DPDB Hall, Longleng nung amentsü ta metetdaktsüogo.

Iba senden nung Sericulture Department-i par Department inyakyim indang osang agütsütsü.

Züngsem ajak iba senden nung tamakok maludaktsüi arua shilem agitsü atema mepeshia metetdaktsüogo.

## Medziphema Town Council ADC & ERO-i metetdaktsü

**Dimapur, Metsüremi/March 7 (TYO):** Medziphema Town Council Additional Deputy Commissioner & Electoral Registration Officer (ERO), P James Swu-i, Medziphema Town Council atema electoral roll special summary revision January 1 dak ajemdaker agitsü ta metetdaktsüogo.

ADC-isa, March 4 nü agütsüba State Election Commission notification dak ajemdaker Medziphema Town Council Electoral Role the

Special Summary Revision agiba mapang temepeshibatem dispose asütsü atema Deputy Commissioner, Chumoukedima Appellate Authority asütsü ta metetdaktsüogo.

Special summary revision agitsü atema Enumerators/supervisors/sector magistrates amala kecha meshimtsü. Anungji individual claimant/objector temi inclusion/deletion atema ERO indang office dangi indang indanga apply asütsüla.



### Kashmiri nunger koktettsü atema maneni inyaktsü: PM Modi



March 07, 2024 nü Srinagar nung 'Viksit Bharat, Viksit Jammu & Kashmir' sentong nung Ato kilonser Narendra Modi, Union MoS for Science & Technology Jitendra Singh aser J&K Lt. Governor, Manoj Sinha nunger tangokba noksa nung angur.

**New Delhi, March 03 (Agencies):** Brihostibarnü Jammu & Kashmir kübok Srinagar nung lokti senden ka nung jembidang Ato kilonser, Narendra Modi-i, Kashmiri nunger melungjang koktettsü atema sorkari maneni inyaktsü, ta metetdaksü.

Srinagar nung aliba Bakshi stadium nung ayongzükba sentong nungji adentsü atema lokti tulu adenshia liasü. 2019 küm August ita tetenzüklen Jammu & Kashmir nung Arrla 370 agienba sülenbo tang mezüing Modi-i J&K semdang.

Iba sentong nung jembidang Modi-i Kashmir lima tenüngsanga, "Alima nung kodak ama bilemba ya o agibo rasa-a meshitettsü," ta ashi."

Paisa, Srinagar ya India nung tourism industry tiyongtsü tesem ka kumogo, ta ashi. "2014 küm sülen ni kodangsa iba tesem semdangdir ni iba o ya jembir- nenok melungjang koktettsü atema ni meranga inyaker aser tangbo ni nenok melungjang koktetoggo ta ni bilemer. Ni ano maneni merangtsü. Iba ya Modi tenangzükba lir," ta pai ashi.

Iba sentong jakdang Modi-i tourism aser aluyimba dak sendakba project aika sangdonga liasü.

Ato kilonser Modi-isa sen crore 6,400 shi jenjang project 53 semzüksü aser Jammu & Kashmir nung sorkar department balala nung mapa nung tang tasen shimoker nisung 1,000 jungnüa nem

mapa nung shimokba shidi agütsü.

Paisa central schemes balala ajanga tajangzük angurtem den sensaksema liasü; parnok rongnung tetsürtem, aluyimertem aser shishilembartem densema liasü.

Modi Srinagar tonga aruba mapang nung BJP nung inyakertemi party wako amer 'Baar Baar Modi Sarkar' ta ayimdena pa pelaa agizük.

Farooq Abdullah-i aniba National Conference aser taoba mapang Jammu & Kashmir Chief Minister Mehbooba Mufti-i aniba Peoples' Democratic Party densema regional party temi J&K Union Territory nung election agitsü akhangba mapang ka nung Modi-i UT semdang.

### India-i bullet train 24 alizüksü atema tezüngzüktep agitsü

**New Delhi, March 07 (Agencies):** India-i Japan dang nungi E5 Series Shinkansen train (bullet trains) 24 alizüksü atema tan ita tatembanglen tashi nung tezüngzüktep agitsü.

Iba maparen kanga kera inyakdar, anungji mezüingbua bullet train ji 2026 küm June-July nungibo amshi tenzüksü imlar.

Osang angazükba agi, iba contract ajakji National High Speed Rail Corporation Ltd (NHSRCL)-i inyaktsü.

Ahmedabad (Gujarat) nungi Mumbai (Maharashtra) tashi kilometer 508 talang bullet train lenmang nungji 'limited stop' aser 'all stop' services alitsü.

Limited-stop trains jagi Mumbai nungi Ahmedabad atongtsü atema ghonda 2 dang agitsü aser tanga train service jagi ghonda ana ser minute 45 shi agitsü.

January ita tashi nung iba project indang maparen shilem 40 shi renemogo; Gujarat nung shilem 48.3 aser Maharashtra

nung shilem 22.5 renemogo.

Tesüiba küm ka tsüngda iba project kübok train lenmang kilometer 100 dak tema renemogo aser ayong tepdanga yangluba train apu trok renemogo.

Railway ministry nung ketdangser kati, "Tesüiba ita ishika Maharashtra nung terenlok kanga lir. State administration-i district collectors ajak dang tan ita tatembanglen tashi nungbo ali bendanga agütsüsü tuyuogo," ta metetdaksü.

### Delhi nung sorkari sangküm March tashi electricity subsidy atsülanger

**New Delhi, Metsüremi/ March 07 (Agencies):** Lok Sabha election agitsü joko mapang ana nung lia Delhi nung Aam Aadmi Party (AAP) sorkari, Delhi nung angati electricity bills aser subsidies sangküm küm tashi atsülanger, ta metetdaksü.

Delhi Chief Minister Arvind Kejriwal leniba nung amenba rongdak emergency cabinet senden ka nung iba telemtetbaji agia liasü.

Senden tembangba sülen AAP lenir aser minister Atishi-i, "Tanü cabinet senden nung Delhi nung alirtem atema angati electricity bill aser subsidies 2024-2025 tashi alitsü atema telemtetba agiogo, ta ni tepela nung sangdonger," ta metetdaksü.

Delhi nung Kejriwal-i aniba sorkari ita shia electric light unit 200 angati agütsür aser ita nung unit 201-400 atsüker nem shilem 50 subsidy agütsür.

Kejriwal-ia X ajanga, "Ni

Delhi nung alirtem nem tenüngsang agütsür. Nenoki anogo shia ghonda 24 electricity methitemi atsükba aser angati electricity sangküm March 31 tashi atsülangtsüogo. Iba nung ya lawyers' chambers atema angati electricity densema lir. Nisung aikati electricity subsidy indang ratamata liasü- sangküm-a iba subsidy angutsü asü mangutsü? ta aikati ratamata liasü. Ni nenok dang ya ashir- item nisungtemi iba ya nokdangtsü merangogo. Saka ner jabasoi iba mapa ya-a inyaktetoggo. Ghonda 24 electricity atsükba aser angati electricity atsükba ya Delhi aser Punjab na kija nung lir. Linük nung tanüingba tesemtem nungbo mapang talanglang electric light magütsür aser electricity bill sen meyirjang aika agütsütsüsa akümer. Delhi nung ochishir sorkar aliba aser shia-metetba nüburtem aliba ajanga ya inyakteter," ta metetdaksü.

### China-i tezüngzüktep balala alema inyaker: S Jaishankar

**New Delhi, Metsüremi/ March 07 (Agencies):** Brihostibarnü External affairs minister, S Jaishankar-i, China linüki mapang talangka nungi India den tezüngzüktep agia aliba telatetbatem alema inyaker, ta tai tongloksü.

Japan yimtiba, Raisina Roundtable senden nung jembidang Jaishankar-i, 2020 küm arrtsülen rara adokba tu China tai ajanga lir, ta metetdaksü.

"Nisung ajaki tensa melenshidar ta ashitsü akok, ajisüaka asenoki akokba tashi tashi ita alitsüla. Ajisüaka tia maka China dak sendakba nung onoki tesüiba küm ter tsüngda ibaji majangshi. Tatishitsü agi, 1975 küm nungi 2020 küm tashi nung- küm 45 tsüngda arrtsülen azü tokshiba maliasü, saka 2020 küm ibaji melenshi," ta pai metetdaksü.

Tasüngdangba ka langzüdang Jaishankar-i, "Onük

aika nung asenok obang meputeptsüa akok, saka kodang linük kati kidanger linük den tezüluba nung tenangzükba agia aliba alema inyakdir ibaji ajanga tesendaktep raksar aser tasüngdangba akatsüsa akümer," ta ashi.

2020 küm June ita nung Galwan Valley nung India aser China sepaitem tsüngda rara tulu adoka liasü. Küm 45 tsüngda iba amaji kodanga merarai liasü.

India-i aiben China den tesendaktep tajungba akümtsü atema arrtsülen yimjung nüngdak, ta jembia arudar.

March 2 nüa sentong ka nung jembidang External Affairs Minister-i kasa oji jembia liasü. India aser China na tsüngda tesendaktep ajungba akümtsü atema tezüngzüktep agia aliba ama shidak inyaktsüla aser Line of Actual Control (LAC) nung yimjung alitsü nüngdak, ta pai jembia liasü.



March 07, 2024 nü Tokyo nung Raisina Roundtable senden nung External Affairs Minister, S. Jaishankar adenba noksa nung angur.

**भारतीय पशु चिकित्सा परिषद**  
Veterinary Council of India

भारत सरकार, मत्स्यपालन, पशुपालन और डेयरी मंत्रालय का वैधानिक निकाय  
(Statutory Body of the Ministry of Fisheries, Animal Husbandry and Dairying, Government of India)

'ए' विंग, दूसरी मंजिल, अगस्त क्रांति भवन, भीकाजी कामा प्लेस, नई दिल्ली 110066 -  
'A' Wing, 2<sup>nd</sup> Floor, August Kranti Bhawan, Bhikaji Cama Place, New Delhi - 110066

**SANGDONG**

2024-25 kümsük atema All India Quota15% kübok recognized Veterinary Colleges nung B.V.Sc. & A H Degree course agitsü atema admission agitsü asoshi Veterinary Council of India-i National Eligibility cum Entrance Test (NEET(UG)-2024 Merit List amshitsü. B.V.Sc. & A H Degree course atema kaketshirtem shimtsü/ admission atema tanga telatetbatemji Veterinary Council of India-i- Minimum Standards of Veterinary Education-Degree Course (B.V.Sc. & A H) Regulations, 2016 nung aliba ama asütsü.

All India Basis nung 15% seats atema B.V.Sc. & A H Degree course asoshi admission agitsü janrar kaketshirtem dang National Testing Agency (NTA)-i 5th May, 2024 (Amongnü) agitsü aliba NEET (UG)-2024 tatidang agütsütsü metetdaksür.

Iba notice ya ajak Public Interest atema sangdonger.

Dated :06/03/2023  
CBC 01222/12/0004/2324

*S. Jaishankar*  
**SECRETARY, VCI (ADDL. CHARGE)**





## TIR YIMYIM YIMOBILEM (EDITORIAL)

DIMAPUR

ROGONÜ

METSÜREMI 08, 2024

### Saru sarur teimba akümer

**D**imapur yimti yimdong nung tsümar meshimetsür anogo shia renlokba angur. Item rongnung tenüktelen shitak lir ser nung tiyazü meshitak amai kümer meshimetsürtema lir. Ano, nisung karbo pei ket nung meshimetsürtem bendena yur anüngdang meshimetsüdaktsür aser aonung parnoki sarutetba ajakji meshidena ayur. Ibaji tera mesüka Dimapur nung Naga yimten nüchiso bushir telok tapu 20 dak tali agi dokan amener aser business tapu balala inyakertem dang nungi saru saruba timtem aser takoksa marem Dimapur Chamber of Commerce & Industries teloki ola adokbaji aremer maremtet adokba tejashi ola ka asütsü. Aji oda, kari yimdong nung meshimetsür aser kari ki telong tashi aita saru meshir ta Dimapur lima ya mapa meinyak meshimetsüba aser saru saruba lima ka kümogo. Iba jagi state government tashimaitba meteter aser mitkartemia ozüng raksartem anema ozüng mamshitetba tamakok sayur. Aji oda, yimtibo ozüng raksartem agi asüng saka ozüng amshitsü purtemi ozüng mamshitetter ta süra government-i pei nübortem ajak ozüng raksartem ket nung bendanga agütsür asütsü. Iba tensa tiaji kodang bilemdangdir, atangji, shisabolutsüka, kechiyong ozüng alema saru sarurtem o nübortem na tsüngda raratsüsa akümtsü. Ibaji dang masü saka kodang yimten nüchiso bushiba tenüng nung linük tenzüker telok aika kümer nübortem dang nungi pei pei saru sarutsü tenzükdir, tamalen ama Naga nung yimten nüchiso bushirtem telok o telok na tsüngda saru mechi azü tokshia rarateptsüsa akümtsü. Joko, Dimapur ama yimti nung meshimetsüba aser saru saruba ajak ya sen menüngba industry ka lapoka ayu amai tangaribo bilemetsüsa kar meshimetsür, kar saru sarur ta kümogo. Iba jagi metetmeteta Dimapur nung oset ajak nung jenjang tasakba akümer aser Dimapur tuluba küma renloktsü melen Khakati lenang tuluba küma odagi. Tangalen nungi kisüjensütsü oset train aser gari nung bener arubatema Dimapur railway station aser Dimapur nung akhidang osettsüsettem ayudak manener saka Assam len Khakati aser Bokajan railway station nung agizüker, kechiyong yangjibo Naga nung telok zünger mezüng ama alirtemia saru memeshitetter. Ibaji dang masü saka tangbo joko khu abenba gari tulua Dimapur nung anena ayutsüa tsübur, anungji Nagaland asoshi khu bener aruba ajak Assam len Khakati aser Bokajan nung dang anena anisüngzüker. Tetezü ozüng raksartem tsübuba agi truck gari dena Khristan-tem aliba yimtii maitteter. Shitakbabo, tang Dimapur Chamber of Commerce & Industries purtemi ola adokba amaji Dimapur nung tenteta aliba lokti tentettem Naga Council-i anir Naga kin shia telongjemtemi ozüng alema saru saruba mapatem anema ola adoktsüla. Ibai yi mayokba tebilemetsü aser takoksa dang nungi tuluba, ibai lokti tebilemetsü, kechiyong iba tebilemetsü yagibo ajak dak kongshir. Aji oda, government dang yi yokdaktsütsü akangtsü melenabo Dimapur nung lokti metsü- semeri dokan purtem aser business tapu balala inyakertem dang saru meshiba timtem anema ya-ang sashisashia nokdaktsü tim. Tang ama tensa tia ya government-i mazüoktet nungbo Dimapur yabo Cow boy aser Taliban ama telok aliba lima ka dang akümtsü aser asenoki aginüba ama yi ayokba dokan kar dak alaka cement, iron, hard & softwares, aonsutsü aser tula süoshi ayokba dokan-tem ajak Nagaland gate ser Assam tsütsü Khakati aser Bokajani lena adoktsü. Idangjibo Dimapur ya yimjen aser yimdok ana kümadaktsü. Iba tia ya kodang angatetdir, Naga nung yimten nüchiso raratsü asoshi tentetba telok renüng nung ozüng alema saru sarurtemia peisasa anentsü aser lokti tentettemia tasüa majem pei lima aser nübortem asoshi ozüng raksartem anema nokdaktsü. Aji oda, Naga nung kanga kümdangtsüba mapa kaji yimten nüchiso tenüng nung saru sarurtem o Naga nung nübortem na tsüngda tsükchiteptsüsa kümra, iba anogo nungji Naga yimten nüchiso atema nokdaker Naga nung telok ajak mali akümtsüsa akümtsü.

## OLEMSABANG

### Asen sobaliba metsüngareta benshitsüla aser wazüka ayutsüla

L. Kika Pongener

*(Yashi adok nungi...)*

Sübo-solemetsü: Mimchir ka temang shi (Physical body) manglong/mangsa (Naked) nembangtsü asoshi 'aben-süoshi' sübor. Ano pa/la jenjang (Status) maitsü jangjatsü asoshi 'sübo-solemetsü' subor. Tanü putu nung tazünger-temetertemi 'Neck tie' & Suit' suboba amai. Anungji 'aben-suoshi' aser 'subo-solemetsü' ana ya balala tebendang lir. Otsüla-oboula nung subo-solemetsü bentet-benteta suboa aru. Otsüla-oboula nung 'Shiret-Kümbang' ya nokinketer aser kika-süchirtemi dang suboa aru. Ano 'Tsüngkotep-Su' ya-a nokinketer aser kika-süchirtemi dang abena aru. Tetsürtem kidong shia waro-sü Supeti balala lir, ibaji wazüka ayutsüla aser aiurtem ajaki pei kidong Sü tejangja meteta alitsüla. Otsüla-oboula nung kibalembu nung aibelen masübaji, kidong shia waro-sü tepentet akaba jagi, shir den lembutsüla shir denbo melembutsüla, aji o agi mejembi-aka waro-su jagi 'Küranur' ta... 'Ayoklar' ta aser 'Jatilar'...ta meteta-adok. Ano tetsür kou alenba kou-pok Mongsentsür o Junglitsür na balala... Mongsentsür küo-pok ang-su temesüng agi alen aser Junglitsür küo-pok ang-su tanak agi alen. Yongji o agi mejembi-aka kou-pok jagi Mongsentsür o Junglitsür na bendanga meteta-adok. Ano 'Yongmen' & 'Tongpang' anoba agi tetsürtem kin-kidong balala bendanga meteta aru. Yamaji otsüla-oboula nung sübo-solemetsü agi nokinketer, kika-süchir, kin-kidong balala bendanga meteta lia aru.

**Kibalembu** : Otsüla-oboula nung nungi asen Aor kibalembu nung kanga dang asüngteta lia aru. Kin ka sobaliba asüngteta aser wazüka ayutsüba tongtipangbaji kibalembu ya lir. Kibalembutsü indang ya tsürabur kati pei chirnur tang tejangja sayutsüla. Pongener asangur kati Jamitsür aser Longkümtsür den kibalembutsü akok. Longkümer asangur kati Pongentsür aser Jamitsür den kibalembutsü akok. Ano Jamir asangur kati Pongentsür aser Longkümtsür den kibalembutsü akok. Iba amaji Pongener, Longkümer aser Jamir, dak nungi jakzüka/razüka aoba kidongtema iba küsaji kibalembutepa aotsü. Otsüla-oboula nung kibalembu nung kanga tang asüngteta lia aruba agi... Chirnur kenshi-Oshir, tashir-tawar, walunir, nokinketer, watsü-wabong, aso-ajen, topur tajung sotet. Otsüla-oboula nung kin-kidong lembuyim süaka azü (Blood) mepila, tatishitsü agi... Adianu-aianu sosem dak jakzüka chirnurtem kidong balala süaka, asemben tashi mokzüka/jakzüka azü pila-a mao tashi kibalembu mesüdaktsü. Kechiba sura, itemji kibalembubaji arimashir, mesüra tanür sopet-dangpet aser tenük-telen mapensa soteter/sosemer ta takzü-takponga ashibanga aru.

**Loktiliba** : Asen Aor ya Chungliyimti lima alidang nungi kija aliba shilo ka masü, saka lokti aliba shilo ka lir. Ajioda, otsüla-oboula nung kodang yim tasen ka akümtsü odir, kija masü kidong tabensa ayongteper yim ka yateta kümteter lia aru. Yimtsüng ka nungji zünga taktet süngpo nungi puti tashi tenung jateta tenzüka aor. Aroju mesema asangurtem kibong maküm tashi idakji yipa sobaliba, yimten-yimli, temzüng-ozüng, libalirotsü, yongsen mapa ajak angazük. Aiurtema kiyi-i mao tashi Tsüki nung yipa idakji sobaliba, libaliro, ola-angla mapa angazük. Yim tzüpo, alu talen lenmang yimer ajak longjemmer inyak. Kiyi-Pongzü asadang aser ayong tulu tzü-ayokdang, yimer külemi longjemmer inyak. Ajioda, külemi longjemmer inyakba jagi tamakoktsü ajak koka lia aru. Yimtsüng terenlok mapa inyakdang yimer ajak saru molok ka sur kilen ayua sarua inyak. Yamaji otsüla-oboula nung kati ka akümtsübutepa sobaliba-a lia aru.

**Yimten-yimli** : Otsüla-oboula nung yimden-yimli takang, temzüng-ozüng telatet shitak benshia, tzü-a meseni zep-zep ta yimsüsüa aru. Putu Menden tasüngtet, kin-kidong tazüng-talak tarensen jangja-jangja, shilang alanga asüngtet-asüngteta yimsusua aru. Putu menden nung ashi-auer, asang-chi (Kita-chir) item amala maniok. Tata-tainer asüyongjia temzüng-ozüng küpok melitet aibelener dangpo tai-tatok maka dalang senchi chia merenshia aru. Otsüla-oboula nung pei sasa alu meranga züsena yimer temerang chi chiyunga, takar-sa masüyongjia pei poksung chiyunga-jema yimsu sua aru...Ibajagi tanak dang tanak aser temesung dang temesung, tajunger dang tajung, tamajunger dang tamajung, shidak dang shitak, tiyazü dang tiyazü aser aibelener dangpo aibelenogo... ta ochi obendang agüja yimsusu sua aru. Tesasatsüka, tanübo tata-tainer-tem-iang temzüng-ozüng nung aibelener, yongji temzüng-ozüng shitak mamshitet miimbanga ayur. Yongji, nutsüng-nubur aibelener-tem dak temzüng-ozüng shitak mamshiteter. Yimsusur tazüngpurtemi anir supokrem nung alanger, yongji ken o indang-indanga ochi nung malangdangteter. Manganutsü mali...Tanü Aor yimden-yimli kecha jenjang maka, mera maket aser aküm-maket ladak-ladaka küma odagi. Iba jagi nutsü-nüburtemi tata-tainer dang aküm- metsübur...Asen tsürabur mapangpo lenmang nung suidang, 'Tata-tainer' kar ajurura...Parnok ajanga süitsübaji 'Molosongzü' aser 'Küyi Tzüko' kar den ajuruteptsü ama kanga-sa aden-dena tsüboseta bilem.

*(Maneni asüng adok nung...)*

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**



# Israel-Hamas rara tenzüker Gaza nung Khristan nütsüng shilem 3 süogo



Gaza nung Saint Porphyrius Arogo indang storeroom nung Archbishop Alexios aser volunteer temi Tenla kidang jenoka alirtem atema chiyungtsü renemtsüdang tangokba noksa nung angur.

**March 07, 2024:** 2005 küm Gaza Strip nung Khristan nütsüng 5,000 liasü saka Israel-i Gaza Strip toktsüba sülen tangbo Khristan nütsüng 1,000 shi dang kümogo.

Yaküm October 7 nungi Israel aser Hamas tsünga rara tenzüker sülen tang tashi nung Khristan 30 shi süogo, anungji ibaji Gaza Strip nung Khristan nütsüng shilem 3 asüba den kasa lir, ta Khristan melungtet telok Aid to the Church in Need (ACN)-i metetdaksü.

Gaza Strip nung asüba Khristan 30 nungiagi parnok 17 bo Israel nunger missile agi Greek Orthodox Church poksatsüba mapang asüba lir, Khristan tetsür ana Israel nunger sniper-i kaset aser Khristan 11 shiranga asüba lir.

Israel aser Hamas na tsünga rara tenzüker mapang nung Gaza nung Khristan nütsüng 1,000 shi dang liasü.

ACN otongdar, Maria Lozano-i, "Tang Gaza nung tensaji ajak atema majung. Tesüba putu aika telok ana tsünga raradang Khristantem tiyongtsü nung teti takoksa angur," ta metetdaksü.

ACN-i ashiba agi, putir ka aser Arogo balala nungi sister temi Gaza yimi nung aliba Holy Family Church nung jenoka alir Khristan 560 shi yaridar.

Lozano-isa, "ACN-i tanga charities den senteper timtemertem nem chiyungtsü aser mozü agütsür. Tang ama tensa ka nung onoki akokba tashi nisung teimtiba yaritsü meranger," ta ashi.

Tawa International humanitarian aid foundations-Orthodox Public Affairs Committee (OPAC) aser Mosaic Middle East natia Gaza nung aliba Palestine nunger Khristantem yaritsü atema tenla agütsütsü ayongzüka liasü.

Parnoki sarutetba senotsüji Holy Family Church aser Saint Porphyrius Church nem agütsür aser iba sen jagi tzi, chiyungtsü aser petrol agütsür.

OPAC Chairman, George Gigicos-i, kibong 400 shi Saint Porphyrius compound nung jenoka lir aser parnok ajakjibo

Khristantem masü, ta ACN-i ashiba agi, Catholic aser Orthodox kibong 180 nungi Khristan 560 shi Holy Family church moapu nung jenoka lir aser parnok rongnung tanur 140, matamabensar 60 aser arrshi küm 65 dak tema teintet senso 84 densema lir.

Rara tenzüker mapang nung Holy Family church compound nung nisung 700 shi jenoka liasü saka tangbo parnok aika süogo aser karbo Gaza toktsür jenogo.

Lozano-i, Khristan 50-60 shibo Egypt, Jordan aser Canada linüktemi jena oadokogo, ta ashi.

University of Notre Dame-i ashiba agi, 2007 küm tashi nung Gaza nung Khristan nütsüng 3,000 shi liasü saka 2021 küm tashi nungbo Khristan 1,300 shi dang aküm aser Israel o Hamas tsünga rara tenzükdangbo

Khristan nütsüng 1,000 shi dang liasü.

University of Notre Dame-i, "Gaza nung yimsü nung ajemdaker Khristantem anema inyaker. Khristantembo 'second-class' sensotem ama züngshir," ta metetdaksü.

Lozano-i, "Gaza nung Khristantem pei tamang manokshir aser putirtem dang nungi tanela chiyungtsü angur. Tang mapang ya kanga tongtibang, kechiyong rara aser tetsübu ajanga nisungtemi pei tamang jenjang asetshitsüa akok," ta ashi.

Laisa, "Gaza nung Khristantem atema tongtibangtibaji yimjung lir. Parnoki onok dang yimjung atema sarasademjang ta mepshir. Parnok taginübaji yimjung dang; yimjung ajanga dang parnok taküm litettsü," ta ashi.

# Assam nung Hindu teloki maneni Khristan school tem amokmerener



Satya Ranjan Borah

**March 07, 2024:** Assam state nung Hindu telok kati Arogoi lapokba school tem dang Khristan school tem nung Khristan yimsü temaitsütem agienang, ta tetuyuba agüja anogo züngzüka liasü, ajisüaka parnoki tuyuba ama meinyakba agi parnoki Khristan school tem anema ken o benoktsü tebilemba lir, ta osang ka ajanga metetdaksü.

Osangebener den jembidang Kutumba Surakshya Parishad (family safety council) nung tongti, Satya Ranjan Borah-i, state nung tematiba court nung ken o benoktsü, ta metetdaksü.

March 7 nü osangbener den jembidang pai, "Ni akhangba pusema kü ket nung documents peria lir," ta metetdaksü.

Hindu telok- Kutumba Surakshya Parishad jagi February 7 nü Khristan school tem nung aliba Khristan temaitsü ajak agentsü atema anogo 15 züngzüka liasü.

February 7 nü ayongzüka osangbenertem senden nungji right-wing telok 10 nungi lenirtemi putirtem aser nun tem dang school nung Khristan yimsü dak sendakba süoshi masemtsü saka civil süoshi dang asemtsü tuyua liasü.

# ANOGO ABEN TSÜNGREM DEN

## Kü sülen arung

*Idangji Yisui Pa nütsüngtem dang ashi, "Kari Kü sülen arunüra pai pei sasa azüokang aser pei kangki apur Kü sülen arung." Mathi 16:24*

Tsüngremer tatenba asenok den lir ta asenoki agizüksü akok. Yisui asenok den teti dena alitsü ta ashi nung, asenok kolenisa odir Pa asenok den aotsü ta asenoki bilemetsü akok (Matt. 28:20). Yisui asenok manidaker; asenoki Pa anidaker. Ne mapa nung atentsü nai Tsüngrem jaoktsü makok. Pai na Pa mapa nung adentsü ajar. Yisui ashi, "Nenoki Ni shim masü, saka Ni nenok shim" (Yn. 15:16). Yisui anidaksü asoshi tashi angaba aginer. Asenok koba nung tapet asütsü mesüra kechi jangrar, ibaji Pai asenok dang masüngdang. Pai asenok dang masüngdangi asenok asoshi koba tajungtiba Pai metet.

Yisui sülen anidakdang nai kodanga mebilemba ajangshitsü! Yisui temenen nung tsüka alirtem asoshi ajepdang na Yisui den alitsü. Yisui shia bilemba ama nai bilemetsü. Tanela nung tenük tapok alirtemi mezüngbuba Tsüngrem ngur pelaba nai angutsü. Taküm raksaa yanglushiba nai angutsü; shirnok talenba nung lir parnok salaa chiokba nai angutsü; aser shirnok mang ayimer parnok süneptsüba nai angutsü. Mapang kar nung Pa magizüksü atitangtsü akok. Yisui anidakba tetezü yipru ajanga aoba mesüra tenem kolak nung noktakba lir.

Na Yisui sülen anidakba anener alitsü akok, saka tang nai tanaben Pa sülen anidakner. Kodang nai Yisui sülen anidaktsü anenadaker, nai ne mulungka aji inyaker. Saka meyipa arubaji Pa tazüokba nung lir. Pa Tsüngrem lir aser na masü. Nai ajaklen Yisui sülen ajaklen aser mashi mapang nung anidakner asü? Nai anidaktsü akokba lenmangji ibaji dang lir.

Borah-i yimjak nung item takhanga agütsü aser tashi mangara Khristan school tem anema inyaksü, ta amokmerena liasü.

Tang Assam nung BJP sorkar lir.

March 7, 2024 nü osangbener den jembidang Borah-i, "Ni Yisui Khrista mesüra Khristan yimsü manemer, ajisüaka missionary school tem nung yimsü dak sendakba temaitsütem kecha mamshitsü akhangar," ta metetdaksü.

"Missionary school kaji tanurtem nem shisaliok agütsütsü atema lir, anungji school nung yimsü dak sendakba temaitsütem ayutsü mesüra staff tem aser tanurtemi yimsü dak sendakba süoshi asemtsü makok," ta Borah-i ashi.

Borah-i shidi ka ajanga Guwahati nung Archbishop John Moolachira dang missionary school tem nung Khristan temaitsütem mayutsü metetdakja liasü.

Tang asentenshir maneni Khristan school tem amokmerenba dak sendakba

nung Archbishop Moolachira-i, "India nung senso ajak dak temeden aliba ama Borah-ia court nung ken o benoktsü akok. Onokia sorkar nem tashishiba shidi agütsüogo," ta ashi.

Assam kübok kanga sensaker tribals aliba tesemtem nung Khristan missionary temi mapang talangka nungi shisaliok agüja arudar.

Moolachira-i, "Onok meyong shisaliok rejutemi sensakertem aser nungdakbapurtem tenzüka arudar, aser ibaji ajanga onoki linük tenzüker. Ajisüaka Khristan rejutem nung tamangba yimsü meyipdaksür, ta tiyazü nung tai tongloksüba ya kanga tesasatsü," ta ashi.

March 5 nü Borah-i shidi ka ajanga state chief secretary dang missionary school tem anema inyaksü takhanga agüja liasü. Pai kasa shidiji chief minister aser Angh nem-a agütsüogo.

Nütsüng million 31 aliba Assam nung nütsüng shilem 3.74 bo Khristantem lir, aser ibaji 'national average' dang nungibo tera agi teimba lir, kechiyong India nung nütsüng shilem 2.3 dang Khristantem lir.



AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Soruchiok

(v) chiyongsü tazü agi mena yangluba (cooking)
\* ozü benjong nung anük-apangtemi kanga junga soruchiok.

Sorokroksü

(adj) teku nongbanga atuba ( chest congestion)
\* Tantsür tambur kümer sorokroksü agi kanga kangshir.

OLONG PAITEP # 6720

Grid for crossword puzzle #6720 with numbered squares.

TIPIEN

- 1. Lepshia - (4)
5. Ishika masü - (4)
6. Yaritepsang - (6)
7. O jembiba yimya - (3)
10. Anü meyalokdak - (5)
11. Jitep - (5)
12. Atem - (5)
15. Nütsü tedi/tenu - (3)
17. Tamagitsü - (6)
18. Ozü apuba oset - (4)
19. Tamakok malu - (4)

LANGTSÜNGLEN

- 1. Ajunga arutsü tasak - (5)
2. Teputep - (5)
3. Züpu tajem - (4)
4. Tatsüka masü temekonga masü - (5)
5. Lepko - (5)
8. Meshiden - (4)
9. Ajunga - (4)
11. Benjong - (5)
12. Anema jembi - (5)
13. Yagi ozü akar - (5)
14. Koktetba - (5)
16. Ilenji - (4)

OLONG PAITEP # 6719 TELANGZÜBA


TIPIEN:

- 1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem, 15. Tambu,
16. Khuret, 17. Sang.

LANGTSÜNGLEN:

- 1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok, 12. Amang,
14. Jala.

NAI-A YA METETTER MA



Georgia anasa tzüym nung nuclear bomb ka sama. 1958 küm tuokzük nung pound 7,000 bomb bena aliba B-47 bomber ka nung luagi Air Force jet ka tsüok. I ba bombji tzü telungi luadok saka tanü tashi menguteter.



Agartala kübok Raj Bhavan nung TIPRA Motha Party MLA Animesh Debbarma (tabelen) ; TIPRA Motha Party MLA Brishaketu Debbarma (tachichi) na Tripura cabinet minister rongnung züngoksemba sülen tenangzüktepa agiba noksa nung angur.

Assam nung LS election atema lepareprangshiba senden amen

Guwahati, Metsüremi/ March 7 (Agencies):

Election Commission of India nungi ketdangsürtem team kati Assam nung taruba Lok Sabha election dak sendakba nung state renemshia aliba asadangtsü atema lepareprangshiba senden ka ayongzüka menogo.

Iba senden nung District Election Officers (DEOs), Guwahati Commissioner of Police, Superintendents of Police (SPs), Deputy Inspector Generals (DIGs) aser Assam nung tanga ketdangsürtemi shilem agia liasü.

Deputy Election Commissioner Hirdesh Kumar-i anir Senior Principal Secretary NN Butolia, Director Pankaj Srivastava aser Secretary NT

Bhutia nungeri ketdangsürtem den sensak asem, shirnoki parnok indang district nung election atema renemshiba indang metetdakja liasü.

Senden nung EPIC tem alemba, polling station tem nung provision balala agütsüba, EVM/VVPATs, nübu aser vote agütsür timba nem shilem agidaktsütsü atema SVEEP inyakyim, election achaayangtsüpur nem training agütsüba, security forces yokba aser election expenditure amala onük balala benoka sensaksemogo.

Deputy Election Commissioner-i ketdangsür ajak dang Assam nung election ya kechi telem dang makai sadem sadema agitsü atema jenjang

tapet agitsü tetuyuba agüja liasü.

ECI team ya anogo ana atema Assam semdangba mapang ka lir aser parnoki Assam Chief Secretary Paban Kumar Barthakur aser sorkar department balala secretary tem den ajurutepogo

Iba team yagisa Chief Electoral Officer of Assam Anurag Goel aser Assam police nodal officer PK Bhuyan na den election dak sendakba nung lepareprangshiba senden ka ayongzüka menogo.

Mezüngbuba anogo ECI team yagi central enforcement agencies balala nungi lenirtem den ajurutepe election dak sendakba nung onük balala benoka sensaksemogo.

Arunachal assembly elections nung NCP menden 60 prongla nungi tokteptsü

Itanagar, Metsüremi/March 7 (Agencies):

Arunachal Pradesh legislative assembly nung menden 60 prongla nung tokteptsü atema Nationalist Congress Party (NCP)-i telemtetba agiogo. Arunachal nung assembly election yakta agitsü.

Ken o kanga junga asadanga sensak asemba sülen NCP-i 2024 Arunachal Pradesh Assembly elections nung menden ajak nungi tokteptsü atema telemtetba agiogo.

Iba telemtetba agiba ajanga Arunachal Pradesh nung aliba nüburtem tejangraba tenung

nung nokdaksü atema party bendanga agütsür aliba sayur aser iba den state nung yimden yimsüsüba tsütsü teyari agütsütsü mulungteter aliba sayur, ta Brijmohan Shrivastav-i ashi.

Shrivastav-i, Arunachal Pradesh nung party bendanga agütsür aliba aser 2024 küm Assembly election nung menden 60 prongla nungi tokteptsü telemtetba agiba ajanga Northeast nung party tenzükertem aser lenirtem kanga jangrabangra kümdaktsüogo.

Brijmohan Shrivastav-isa,

NCP pur menden ajak nung tokteptsü atema telemtetba agiba ajanga Arunachal Pradesh nung lenirtem dak tamang akaba parnok nükla aser state nung tang ken o tem bentettsü atema parnok dak tashi aliba sayur, ta ashi.

Party nükjidong lemsatepba mapang Brijmohan-i, NCP ya yimden yimsüsüba tsütsü lokti tentet ka aser iba party ya democratic values tem mesamadaktsüi wazüka ayutsü aser India ajunga nung loktiliba aser rongsenketzüng terenlok asoshi bendanga agütsür aliba sayur, ta ashi.

Manipur nung KCP züngsem ana apu

Imphal, Metsüremi/March 7 (Agencies):

Imphal nung shishilembartem aser nüburtem dang rakzürakdemba atema tenokdangba agütsür aliba Kangleipak Communist Party (KCP) den sendaktepa aliba nisung ana Manipur police-i puogo.

Osang tejangja ka angazükba sülen police-i KCP (Taibanganba) faction züngsem ana puogo. Aija alisang ana ya Yumnam Arvind shiba dang Mangangcha Singh (21) ta ajar

as er Oinam Rakesh Meitei (20) ta jangjaogo.

Tenaprongla ya Manipur kübok Bishnupur District nungi lir aser tena ya Imphal temeket nung private school tem, mozüki tem aser longru yangludaktem dang ozüng alema sen meshiba atema aija puogo.

Taoba ghonda 24 tsüngda Imphal West district meita aoba mapang Kangleipak Communist Party (KCP) züngsem ana ya pua liasü. Meita aoba mapang police-i

mobile phone ana, Aadhaar card ana, sen 3370 aser gari ka tena ket nungi nguteta liasü.

Thokchom Iboyaima Singh apuba sülen tang nisung ana ya puogo.

Singh ya KCP (Lamyamba Khuman) faction züngsem ka lir, shiba Imphal temeket nung shishilembartem aser nüburtem dang nungi rakzürakdemba nung densema liasü.

Police-i parnok asemprongla anema ken o benokogo aser bushisüngdang maneni südar.



# Ni atsüngdokba nung bendanger teka lir: Gotabaya Rajapaksa



**Colombo, Metsüremi/March 07 (Agencies):** Sri Lanka indang taoba tir Gotabaya Rajapaksa menden nungi atsüngdokba atema mapang talangka ola madoki lir Brehostibarnü kaket ka sayaba nung China aser danga linüktem tsüngta mepetmesüba mechi par sorkar lao ta shia lir.

Iba asetkong linük nung rongsenketzüng tsütsü timtem tulu ajurua ita aika yimti-yimtung nung longka aiter 2022 küm longkak aiterem pa aliba kidangi nungboka aitba sülen Rajapaksa ya mapang tatsüka bendang lima nung jenoka alitsüsa akum.

Par sorkar laoba indang "The Conspiracy" kaket pai züluba nung Rajapaksa-i par sorkar indang economic policies

bhukuma shia lir, koba ajanga bendanger dang sentsüh tali akum aser ita aika chiyongtsü aser totzü agi anünga liasü.

Ajisüaka 2006 sülen Sri Lanka nung China-i senotsü teyari agüja ki o jen yangluba ajanga 'geopolitical rivalry' aiddaktsü aser ibaji ajanga pa atsüngdok ta Rajapaksa-i ashi.

"Yimsüsüba menden nungi ni atsüngdoktsü mera agiba nung bendanger teka mali ta shingaia meshitettsü," ta pai zülua lir.

Rajapaksa-i linük kata tenüng teta mali saka United States-i taoba mapang Sri Lanka dang ki o jen yanglutsü atema China matsüngdang sentsüh yongi aitsü sang nung mashitsü aiben shia liasü.

Pa atsüngdokba mapang arishi küm 74 tain Rajapaksa ya

mitkar indang tayimtsü ka nung Sri Lanka yutsür ao aser Singapore nungi email ajanga pa mana yutsüba metetdaksü aser iba sülen kidangi meshilang.

Rongsenketzüng jenjang mejungi akumba ajanga nüburtemi longkak aitba nung bendangeri senotsü agütsüba lir, ta Rajapaksa-i kaket nung zülü saka kuli magütsü.

Beijing-i Sri Lanka nung terenlok aliba projects aika atema senotsü agüja lir aser item rongnung kangabo mamshiba convention centre aser Rajapaksa'er ki aliba Hambantota nung airport ka densema lir.

Sri Lanka asoshi sentsüh temenoktsü aliba timtiba linükji China ya lir, aser par dang iba asetkong linüki bendanger nem temenoktsü sentsüh aliba shilem ter shi lir.

2009 küm civil war tembangdaktsüba nung Rajapaksa-i yariba asoshi pa nüngtugu akum.

Pa 2019 küm tir inyaktü shimtet, saka küm asem majungdang rongsenketzüng jenjang tamajungba kuma pa dak nüburtemi temulung melemi akum.

Pa melensang Ranil Wickremesinghe-i International Monetary Fund dang teyari meshia sorkar senpong tajungba kumdaktsü.

# Houthi puri yokba missile aser drone tem US destroyer kati khazüka yok

**Dubai, Metsüremi/March 7 (Agencies):** Houthi teloki Temerem tzüylim leni yokba missile ka aser drone tem US indang destroyer kati khazüka yokogo, ta ketdangsürtemi Bodhbarnü metetdaksü. India navy-ia iba tatalokba indang noksa ka lemsatepogo.

Mongulbarnü yokba missile aser drone tem ya Arleigh Burke-class destroyer, USS Carney dak rangloker yokba liasü. Iba rong ya Houthi pur den raraba mapang American-i amshia arudar.

Houthi puri bomb abenba drone tem aser anti-ship ballistic missile ka yoka liasü, ta U.S. military indang Central Command-i ashi.

Iba sülen US-i anti-ship missiles asem aser bomb bena aliba drone boat asem raksaja liasü, ta Central Command-isa shisem.

Houthi military otongdar Brig. Gen. Yahya Saree-i, iba rong amakba nangzükogo, saka parnoki America nunger indang warships ana maka liasü ta ashi.

"Gaza Strip nung Palestine nunger sabanger aliba mesalatsü tashi Houthi puri maneni jenjang tesashi agütsü," ta Saree-i ashi.

Saree-i parnok indang missile aser drone tem raksatsüba indang kecha mashi. January ita nungi tenzüka American-i anir amakba mapang teraksatsüba kwika adok iba indang Houthi puri kecha telangzüba magütsü, saka iba rara nung parnok sepa 22 tepsetogo tabo metetdaksüogo.

November ita nungi tenzüka Israel aser Hamas na raradak sendaba nung iba telok yagi Temerem tzüylim nung rongtem maka arudar.

U.S-i anir ita ka dak tema Houthi pur makaka parnoki maneni kanga tashi ita rongtem maka arudar. Taoba ita parnoki fertilizer bena aliba Rubymar rong maka liasü, koba Honibarnü tzüyimi angumeoka iogo. Parnokisa USD million aika alang America nunger indang drone-a ka khazüka yokogo.

# Venezuela tir election July 28 nü agütsü

**Caracas, Metsüremi/March 7 (Agencies):** Venezuela Tir election July 28 nü agütsü sangdongogo, koba imla aliba dang nungi ita ka jilia agütsü.

Tir Nicolás Maduro shibai linük küm 11buba yimsüsüa arudar pai iba election ya akoktsü imlar.

Pa den tokteper María Corina Machado, senotsü ochi meshi amshiba atema aija election nung metoktepdaktsütsü atema tenokdangba agütsür lir, koba lai magizüki arudar.

Venezuela nung taoba küm sorkar aser opposition nati 2024 küm election agütsü aser international observers tem jaoktsü atema mulungtepa liasü.

2018 küm election koba Maduro-i koka liasü, iba election ya sadem sadema aser

tebendang makai magi ta shia taittsüba aika ajangshio.

Election agütsüba anogo ya Venezuela indang National Electoral Council (CNE)-i Mongolbarnü sangdonga liasü.

CNE tekolakba Elvis Amoroso-i ashiba agi, council züngsemtem-i anogo 30 shi asadangba sülen July 28 agütsü atema mulungtepa liasü.

"Linük Tir election agütsü aser maneni nüburtemi takok tulu angütsü imlar," ta pai ashiba AFP news agency sangdong ka ajanga metetdaksü.

Election nung tokteptsü atema candidate temi March 25 nü tashi nung register asütsüla.

Election imla aliba dang nungi takaraba agütsü atema telemtetba agiba ajanga Venezuela nung opposition party asoshi Machado melener ka

shimtsü atema mapang kanga petdaka akümtsü.

Tenokdangba agütsür liaka lai maneni nüboyimba sentong nung shilem agidar aser election nung tokteptsü mulungteter lir.

2023 küm sorkar aser opposition nati tenangzüktepa ka yangluogo aser iba ajanga 2024 atema telok anapronglai agizüktetba inyakyim kar benokogo.

Iba tenangzüktepa yangluba sülen US-i Venezuela indang oil sector nung tenokdangba agütsür aliba kar aginja liasü.

2018 küm election ya ozüng alema lir ta shia Washington-i tenokdangba agüja liasü.

January ita Venezuela nung SC-i opposition candidate Machado nem tenokdangba agütsüba agüzükba sülen US-i ano tenokdangba agütsüshitsü amokmerena liasü.



Gaza Strip kübok Khan Younis nung Israel sepaitemi amakdang asürtem aremba sentong nung Palestine nunger dena aliba noksa nung angur.

**OFFICE OF THE AKHOYA STUDENTS' UNION**  
P.O Changtongya Town, Pin-798613  
Dist. Mokochung, Nagaland

**TENÜNGSANG AGÜTSÜR**



**Meyisungit Longkumer**



**Shilurenem Longkumer**

Akhoya Shisaluyimer Telongjem ajanga item shisaluyimertemi NPSC-3/CTSE-2023 tatidang nung takok tulu ngua khonang nüngsang bener arutsü nung parnok nem tepela tenüngsang yimyim sangoktsür.

- Mr. Meyisungit Longkumer**, S/o. Lt. Imtiakum & Mrs. Ladongrenla, Rank 1st Veterinary Assistant Surgeon under Animal Husbandry and Veterinary Service Department.
- Mr. Shilurenem Longkumer**, S/o. Lt. Emkong Tonger & Mrs. Lemjan Phom, Rank 1st Extension Officer under Sericulture Department.

Tsüngremi nenok taküm aser wadang ajak nung maneni moajangma.

*Shisaluyimer wadang nung,*

**Sd/-**  
**(Wapangtoshi. K Jamir)**  
Tir, AST

**Sd/-**  
**(Asenla Imti)**  
Tongti Zülur, AST

**ALI AYOKTSÜ LIR**  
Foothill Road nungi minute 2 pilar. Ninetu Hozukhe Village.  
Rs. 25/- per Sq. feet. **Contact : 8974869756 / 9612525262**

Branch Name	Customer Name	Loan A/c No.	Amount Outstanding	Date of Demand Notice	Gross weight grams.	Net weight grams.
DIMAPUR [NL]	KRIPASINDHU DEY	XXXXXXXXXX2474	194342	29-9-23	108.200	98.000
DIMAPUR [NL]	SERLIN BEYPIH	XXXXXXXXXX7364	188492	29-9-23	113.400	98.600
DIMAPUR [NL]	AKALI SUMI	XXXXXXXXXX3246	43791	10-10-23	22.600	22.000
DIMAPUR [NL]	KINIVI H CHOPHI	XXXXXXXXXX2365	71009	29-9-23	38.800	36.800
DIMAPUR [NL]	NEIKERANUO MEDOZE	XXXXXXXXXX2229	43181	29-9-23	23.600	22.000
DIMAPUR [NL]	ABRAR ALAM KHAN	XXXXXXXXXX6681	206361	25-10-23	58.500	50.500
DIMAPUR [NL]	MUKESH BHAGAT	XXXXXXXXXX4261	43791	25-10-23	15.000	11.000
LHOMITHI BAZAR [NL]	MD ABUL HUSSAIN	XXXXXXXXXX8134	227869	5-9-23	130.800	123.600
LHOMITHI BAZAR [NL]	RAJ DEB	XXXXXXXXXX9179	46262	30-5-23	28.420	23.000

Axis Bank Ltd. dak jelia osang magütsü account agütsü/auction anogo melentsü tashi lir. Auction ya online <https://gold.samil.in> (website of online vendor) nung **12.30 pm - 3.30pm** tsüngda agütsü. Terms and conditions tejangja metettsü asoshi agüja aiba website <https://gold.samil.in> (website of online vendor) nung angütsü.

Date: 08.03.2024  
Place: Kolkata

Authorized Officer  
Axis Bank LTD



# Jaiswal-i Kohli ajateta otsü tasen ka yangluogo



**New Delhi, Metsüremi/ March 7 (Agencies):** India nunger opener Yashasvi Jaiswal-i Brehostibarnü taoba India captain Virat Kohli aser tanga India nunger batsmen tajungtem ajateta England den Test asayamung ka nung run timtiba yangluba asayar kümogo.

Dharamsala nung England den tatembangbuba aser pongububa Test asaya

mezüngbuba anogo Jaiswal-i iba alizüing ya tongteta liasü.

Mezüngbuba anogo tatembangbuba session nung Jaiswal-i Kohli ajateta liasü, shiba 2016 küm kidang England den asayaba mapang run 655 yanglur liasü. Run 57 yanglur out masü tsüingda Jaiswal-i tang asaya aliba asayamung nung ajak senteper run 700 dak tema

Iba list nung India coach

Rahul Dravid tasembuba jenjang nung lir. Dravid-i 2002 küm India team England den oa asayaba mapang run 602 yanglua liasü.

Iba sülen ano pezübuba jenjang nung Kohli lir. 2018 küm India team England nung oa asayaba mapang pai run 593 yanglua liasü.

Maneni India nunger nüngtugu asayar Sunil Gavaskar-i, 1979 küm England den asayaba mapang run 542 yanglu aser Vijay Manjrekar-ia England den asayamung ka nung run 586 yanglur lir.

England den asayamung ka asayaba mapang run timtiba yangluba asayar akümba dang masü Yashasvi ya Test run 1000 yangluba India nunger asayartem rongnung tanabuba kümogo. Arishi küm 22 tain asayari iba alizüing ya innings 16 nung tongteta liasü. Mezüngbuba nung Vinod Kambli lir, shibai innings 14 nung run 1000 yanglua liasü.

# World Cup Qualifiers atema Stimac-i asayartem sangdongogo



**Metsüremi/March 7, 2024 (Agencies):** India team Asian Cup squad nung yiruba ajanga meshimba sülen Central defender Anwar Ali aser defensive midfielder Jeakson Singh na Afghanistan den iba ita tatem 2026 FIFA World Cup qualifying round 2 asayatsü atema asayar 35 (probables) shimba rongnung densema lir.

India team March 21 nü Afghanistan den away game Abha, Saudi Arabia nung asayatsü aser home game Guwahati nung March 26 nü asayatsü. Afghanistan indang home game tem linük nung masü saka tangalen asayar.

Mohun Bagan Super Giants nungi asayar, Ali tetsüing teloktep yiruba ajanga taoba küm mapang talangka masaya aser ibayongji pa taküm January ita Asian Cup nunga masayatet. Pa iba ita tetenzüklena ISL asayaba mapang yirua liasü.

Kasa mapang nung Jeakson taoba küm November ita tapu

surgery agia liasü. Tenaprongla taneptsü nguogo aser tang Indian Super League nung pei team nungi asayadar.

Winger Ashique Kuruniyan taoba küm September ita anterior cruciate ligament (ACL) yiruba sülen tang tashi taneptsü monguteti lir anogji pa meshim.

India team puti otsü nung tang mezüngbuba FIFA World Cup qualifiers round tasembubai aitsü atema imla atadar.

Head coach Igor Stimac-i, pai India team FIFA World Cup qualification tasembuba round tonga anitsü ta tenangzükba agütsüogo.

Qualifier nung India team Group A nung Qatar, Kuwait aser Afghanistan den ata lir. Iba telok nungi temaba jenjang nung tembangba team ana FIFA World Cup qualifiers round tasembubai aitsü.

India team-i tang tashi nung Kuwait goal 1-0 agi koker lir.

### Asayartem:

**Goalkeepers:** Gurpreet Singh Sandhu, Amrinder Singh, Phurba Tempa Lachenpa, Vishal Kaith.

**Defenders:** Akash Mishra, Lalchungnunga, Mehtab Singh, Pritam Kotal, Rahul Bheke, Nikhil Chandrashekar Poojary, Subhasish Bose, Narender, Anwar Ali, Roshan Singh Naorem, Amey Ganesh Ranawade, Jay Gupta.

**Midfielders:** Anirudh Thapa, Brandon Fernandes, Liston Colaco, Mahesh Singh Naorem, Sahal Abdul Samad, Suresh Singh Wangjam, Jeakson Singh Thounaojam, Deepak Tangri, Lalthathanga Khawlhring, Lalengmawia Ralte, Imran Khan.

**Forwards:** Sunil Chhetri, Ishan Pandita, Lallianzuala Chhangte, Manvir Singh, Vikram Partap Singh, Rahul Kannoly Praveen, Nandhakumar Sekar, Isak Vanlalruatfela.

# Rafael Nadal ATP Indian Wells nung masayatsü

**Metsüremi, March 7, 2024 (Agencies):** Rafael Nadal, Indian Wells Masters nung asaya-a ATP Tour nung asaya tenzükshitsü atema sentong aliba thiogo aser pai Bodhbarnü ashiba agi, pa iba asayamung nung shilem agitsü atema renema mali.

Anogo pezü tejakdang Las Vegas nung külem Spain nunger asayar world number two Carlos Alcaraz den exhibition asaya ka nung tamakok anguba sülen arishi küm 37 tain Spain nunger nüngtugu asayar yagi iba telemtetba agia liasü.

Nadal 2023 küm tepok nung timtim aliba aser tanga telen balala yiruba ajanga asayamung timba nung shilem magitet aser pa taküma Brisbane International dang asayar lir, kong pa hip yirushia liasü.

Grand Slam 22 tashi koker aliba asayar ya Indian Wells nung Brehostibarnü Canada nunger taoba mapang Wimbledon finalist Milos Raonic den mezüngbuba asayatsü liasü.

"Kanga dang mepelar saka ni Indian Wells nung iba asayamung masayatetsüsa kümogo," ta Nadal-i ashi.

"Ni kanga meranga inyaka aruogo, saka iba amala tongtibang asayamung ka nung

temaba jenjang nung asayatsü atema ni renema mali.

"Iba telemtetba agitsü temela masü asü, ajisiak ni küsasa aser fan tem dang nai asayatetsü ta koda teyazü sayutetsü.

"Ni nenok ajak kanga menongratsü aser iba asayamung ya kanga takok ngua asayatsü tamang akar," ta Nadal-i ashi.

Indian Wells tournament director Tommy Haas-i, Nadal masayatetsüsa akümba atema kanga tezüdanga bilemba lemsatepogo.

"Pa maneni taneptsü angutsü aser yakta asaya tenzüktsü imla atar," ta Haas-i ashi. "Pa ya idaki fan temi kanga saklokba asayar ka lir aser pa tarutsü nung Indian Wells nung tanaben asayaba angutsü imla atar," ta paisa shisem.

Deobar aonung Las Vegas nung Alcaraz den asayaba mapang Nadal-i kanga meranga shilem agiogo.

January ita Brisbane nung tetsü yiruba sülen Nadal Australian Open nunga shilem magitetsüsa aküm.

Iba sülen pa February ita Qatar Open nunga shilem magitet aser iba mapang pai pa asayatsü atema renema mali ta ashi.

# Dinesh Karthik IPL asaya nungi anentsü

**New Delhi, Metsüremi/ March 7 (Agencies):** Wicketkeeper-batsman tejen Dinesh Karthik taküm tatembangbuba Indian Premier League (IPL) nung asayatsü renema lir, koba March 22 nü nungi tenzüktsü.

Taküm IPL asayaba sülen arishi küm 38 asayar ya international asaya nungia anentsü atema asadangtsü.

BCCI source kati ashiba agi, taruba IPL asayamung ya Karthik asoshi tatembangbuba asayamung asütsü. Karthik ya 2008 küm IPL tenzükba mapang nungi tang tashi asaya arudar aser kümtem tsüingda pa team balala trok nungi asayaogo.

Karthik IPL nung mezüng Delhi Daredevils (tang Capitals) nungi asaya aser iba sülen Kings XI Punjab, Mumbai Indians, Gujarat Lions, Kolkata Knight Riders nungi asayaogo aser tang Royal Challengers Bangalore nungi asayadar.

IPL nung Karthik asayaba yimya ajanga fan aser pundit tem aikati pa sakloka aküm. Kümtem tsüingda asaya aruba mapang pai 2022 season nung RCB nungi kanga junga asayaogo. Pai iba asayamung nung asaya 16 nung run 330



yanglu aser pa indang average 55 aser strike rate 183.33 liasü.

Karthik ya IPL nung dang masü saka linük tenüing nungi international asaya nunga kanga junga shilem agiogo. Pai Test asaya 26, One-Day Internationals (ODIs) asaya 94 aser Twenty20 Internationals (T20Is) asaya 60 nung asayaogo.

Karthik ya sempet tajung aketba asayar ka lir ajisiaka international asaya nung pa nüngtugu wicketkeeper-batsman MS Dhoni den tokteptsüsa akümba ajanga aibenbo maongka mongui liasü saka maongka anguba mapang pai kanga junga asayaogo.

Pa tatemsa Navi Mumbai nung DY Patil T20 Cup nung asayaogo aser iba ajanga pai iba asaya asayatsü jangraba aser temulungtetba tulu aliba sayuogo.

**BILEMDANGANG**  
"Ajak den putepa litetra temaotsü."